

Na osnovu člana 15. Zakona o principima lokalne samouprave Federacije Bosne i Hercegovine ("Službene novine Federacije BiH", broj 49/06 i 51/09), člana 107. Statuta Općine Ilijaš, prečišćeni tekst ("Službene novine Kantona Sarajevo", broj: 20/09) i člana 9. Odluke o stipendiranju učenika i studenata sportista sa područja Općine Ilijaš ("Službene novine Kantona Sarajevo", broj: 49/16), Općinski načelnik d o n o s i:

**PRAVILNIK**  
**o stipendiranju učenika i studenata sportista**  
**sa područja Općine Ilijaš**

## **I. OSNOVNE ODREDBE**

### **Član 1.**

Ovim pravilnikom utvrđuju se osnove, način i kriteriji stipendiranja učenika i studenata koji postižu vrhunske sportske rezultate na domaćim i međunarodnim takmičenjima, a imaju prebivalište na području Općine Ilijaš (u daljem tekstu Općina).

### **Član 2.**

Općina će u toku jedne školske/akademske godine dodijeliti ukupno 3(tri) sportske stipendije za učenike i studente koji postižu vrhunske sportske rezultate na domaćim i međunarodnim takmičenjima (u daljem tekstu učenici/studenti sportisti).

Sredstva za stipendiranje učenika/studenata sportista obezbijavaju se u Budžetu Općine.

## **II. KONKURS**

### **Član 3.**

Stipendije se dodjeljuju na osnovu provedenog konkursa za izbor kandidata za dodjelu stipendija učenicima/studentima sportistima Općine Ilijaš. Konkurs raspisuje Općinski načelnik putem Službe za društvene djelatnosti, a objavljuje se na oglasnoj ploči i web stranici Općine Ilijaš.

Konkurs ostaje otvoren 15 dana od dana objavljivanja.

Konkurs sadrži:

- opće uslove i kriterije za dodjelu stipendije,
- visinu i broj stipendija koje se dodjeljuju,
- naziv i adresu tijela kojom se prijave podnose,
- rok za podnošenje prijave,
- rok za objavljivanje rezultata konkursa,
- popis dokumenata koje je potrebno priložiti uz prijavu,
- druge potrebne podatke od značaja za uredno provođenje konkursa.

## **III. PRAVO UČEŠĆA NA KONKURSU**

### **Član 4.**

Pravo učešća na konkursu za dodjelu stipendija ima učenik/student sportista koji ispunjava sljedeće uslove:

- da je državljanin BiH,
- da ima prebivalište na području Općine najmanje tri godine prije objave konkursa,
- da ima navršenih 12 godina,
- da je takmičar u kontinuitetu najmanje tri godine,
- da je član kluba koji je registrovan za takmičenje u matičnom sportskom savezu Bosne i Hercegovine.

Pravo na dodjelu stipendija nema učenik/student koji prima stipendiju po drugom osnovu.

## **IV. PRIJAVA NA KONKURS**

### **Član 5.**

Učenici/studenti sportisti podnose prijavu na objavljeni konkurs.

Uz prijavu je potrebno priložiti slijedeće dokumente:

- prijavu na konkurs sa tačnom adresom, brojem-kontakt telefona i ostalim kraćim podacima,
- izjavu da kandidat ne prima stipendiju po drugom osnovu ovjerenu od općinskog organa uprave,
- potvrda o redovnom školovanju,
- izvod iz matične knjige rođenih,
- uvjerenje o državljanstvu,
- uvjerenje o kretanju ne starije od 30 dana,
- ovjerenu kopiju takmičarske knjižice,
- potvrdu matičnog sportskog saveza o postignutim sportskim rezultatima podnosioca prijave,
- dokaz o ostvarenim rezultatima sa zvaničnih takmičenja priznatih od svjetskih i evropskih federacija.

Dokumenti se prilažu u originalu ili ovjerenoj kopiji.

## V. KRITERIJI ZA IZBOR KANDIDATA

### Član 6.

Utvrđivanje rang liste kandidata za dodjelu stipendija vrši se na osnovu ostvarenih sportskih rezultata u pojedinačnoj i ekipnoj konkurenciji na državnim prvenstvima i međunarodnim takmičenjima priznatim od svjetskih i evropskih federacija, a vrednuju se aktuelni rezultati, i to:

- osvojeno 1., 2. i 3. mjesto na Olimpijskim i paraolimpijskim igrama, svjetskim prvenstvima i kupovima, evropskim prvenstvima i kupovima, Evropskim i Mediteranskim igrama, Balkanskim prvenstvima i međunarodno priznatim sportskim takmičenjima,
- osvojeno 1., 2. i 3 mjesto na međunarodnim sportskim takmičenjima-minimalno 8 država učesnica iz kalendara takmičenja,
- ostvarena najmanje jedna pobjeda na evropskom, svjetskom i olimpijskom, odnosno paraolimpijskom takmičenju,
- osvojeno 1., 2. i 3 mjesto na državnom prvenstvu.

Vrednovanje rezultata vršit će se na osnovu zvanične potvrde o ostvarenom rezultatu u prethodnoj godini, koju izdaje matični sportski savez kod kojeg je kandidat registrovan za takmičenje.

### Rezultati se vrednuju prema sljedećoj BODOVNOJ TABLICI:

Naziv sportskog takmičenja	POJEDINAČNA TAKMIČENJA				EKIPNA TAKMIČENJA			
	I mjesto	II mjesto	III mjesto	1 kolo	I mjesto	II mjesto	III mjesto	1 kolo
Olimpijske i paraolimpijske igre	100	90	80	50	90	80	70	50
Svjetsko prvenstvo i Svjetski kup	100	90	80	50	90	80	70	50
Evropsko prvenstvo i Evropski kup	100	90	80	50	90	80	70	50
Evropske lige	100	90	80	50	90	80	70	50
Mediteranske igre	60	50	40	-	50	40	30	-
Balkansko prvenstvo i međunarodni turniri	50	40	30	-	40	30	20	-
Državno prvenstvo	30	20	15	-	25	20	15	-

Vrednovanje rezultata vrši se tako što se boduje najbolji aktuelni rezultat takmičara, Ukoliko je takmičar postigao više rezultata na jednom takmičenju bodovat će se samo jedan najbolji rezultat.

Ukoliko dva kandidata imaju isti broj bodova nakon bodovanja najboljeg aktuelnog rezultata

rangiranje se vrši na osnovu drugog postignutog rezultata, sve dok se ne utvrdi razlika u bodovima.

Takmičarima iz matičnih sportskih saveza koji nemaju jedinstvenu međunarodnu federaciju, broj bodova za plasmane na međunarodnim takmičenjima umanjuju se za 30%.

Rezultati u neolimpijskim sportovima vrednuju se sa 30 % bodova manje u odnosu na olimpijske sportove.

Za takmičare iz jednog sporta može biti dodijeljeno najviše 30% sredstava namijenjenih za stipendije.

## **VI. POSTUPAK DODJELE STIPENDIJA**

### **Član 7.**

Općinski načelnik imenuje komisiju za dodjelu stipendija (u daljem tekstu: Komisija). Zadaci Komisije su: pregled prispjelih prijava i dokumentacije, utvrđivanje rang liste po objavljenom konkursu za dodjelu stipendija učenicima i studentima sportistima sa područja Općine, a na osnovu utvrđenih kriterija iz člana 6. ovog pravilnika.

Komisija uz suglasnost Općinskog načelnika objavljuje konačnu rang listu kandidata koji su dobili stipendiju na Oglasnoj ploči i web stranici Općine.

Svaki učesnik u Konkursu može u roku od 8 dana od objavljivanja rang liste podnijeti prigovor za zaštitu prava Općinskom načelniku koji donosi konačnu odluku po prigovoru.

### **Član 8.**

Na osnovu pravosnažno okončanog postupka po prigovorima, Općinski načelnik sklapa ugovor s korisnikom stipendije. Ukoliko je korisnik stipendije maloljetan, u njegovo ime ugovor sklapa zakonski zastupnik (roditelj ili staratelj) uz supotpis maloljetnog korisnika stipendije.

## **VII. PRAVA I OBAVEZE KORISNIKA I DAVAOCA STIPENDIJE**

### **Član 9.**

Stipendija se dodjeljuje za jednu školsku godinu, a isplaćivat će se devet mjeseci u iznosu od 100 KM mjesečno, iz namjenski obezbijeđenih budžetskih sredstava Općine.

### **Član 10.**

Korisniku stipendije, koji je potpisnik ugovora o stipendiranju, bit će obustavljena dalja isplata stipendije i Ugovor će biti raskinut ako:

- učenik/student sportista napusti školovanje,
- promijeni mjesto prebivališta,
- ukoliko se utvrdi da korisnik stipendije Općine Ilijaš koristi stipendiju po nekom drugom osnovu. U ovom slučaju korisnik je dužan izvršiti povrat do tada primljenih sredstava od Općine Ilijaš u roku od 30 dana od dana raskida ugovora.

## **VIII. PRELAZNE I ZAVRŠNE ODREDBE**

### **Član 11.**

Terminološka upotreba muškog ili ženskog gramatičkog roda u Pravilniku podrazumijeva uključivanje oba spola.

### **Član 12.**

Ovaj Pravilnik stupa na snagu danom objavljivanja na Oglasnoj ploči ili web stranici Općine Ilijaš.

**Broj: 01/2-40-38/17**  
**Ilijaš, 06.01.2017.godine**

**OPĆINSKI NAČELNIK**

**Akif Fazlić, dipl.ecc.**